

卷之三

舊傳 行畧

墓誌 行狀

誄文 壽序 傳

節孝傳

節孝畧

桃南朱氏宗譜

陸字號

丙

殿元公傳

公諱士魁字殿元鏜公之四子也生而明敏早肄詩書事父母
膝下依依雖長僅扶床而勤定省樂溫清已頗知人子職及長
天性真摯不異少年孺慕父母卽加以難處之事公亦唯唯奉
命不憚辛勤遇親有疾病則日夜憂煎寢不安席食不甘味故
終其身人稱孝行處兄弟一堂聚首式好無尤當是時食指繁
多然推梨讓棗不以財貨生骨肉嫌且待諸子姪則一體相關
衣無常主食必共器蓋姜公大被田氏荆花猶復見于今日云
爲人謙和溫厚滿座春風先是公家本饒裕于人絕無所求然
公履滿思謙處福思下絕不以是傲物凌人其於貧乏者則扶

危濟困緩急相通卽至再至三絕無吝色蓋鮑叔之分金范舟之贈麥亦不是過也他如嚴以治家兒童守禮慈以恤下臧獲沾恩其於非分之財無稽之語事雖微必謹地雖密必嚴尤可見公爲盛德君子耳是以邑侯楊公諱茂祖嘉其品行公舉鄉飲郡守何公諱金城贈額獎勵曰瑞靄淳風誠不愧也元配嚴孺人坤德無慚克勸內則生子四人長憲道次憲忠次憲儒次憲德孫男四人奇盛奇通奇貴奇富皆克繩祖武無忝前人則公之餘慶不可于是卜之乎余愧不文然潛德幽光竊思表見遂率筆而爲之傳

皇清康熙三十一年歲次壬申孟秋月

辛未歲進士候選訓導同里周悌頓首拜撰



建吾公行畧

我父幼時從先大父宦遊習舉子業卽具凌雲志髫歲蜚聲桃
邑課業澤宮諸多士中父輒首掇焉其博學廣記至老不衰性
耽書籍凡諸子百家無不披校一覽卽成誦焉以故詞賦琳瑯
咳吐珠璣卽藝林中亦不概見故潯溪族叔太師公聞而慕之
談心莫逆每憐其以一衿老焉間嘗至先大父門弟家一吏部
文選司呂君一工部尙書曾君勸其例授小就以答師恩于萬
一父卽告辭且曰大丈夫學富五庫用足三冬取科第如拾芥
耳寧向貴介中求生活耶兩君度不能留亦不相強厚贈而返
歸延名師課伯兄輩歲費不啻百金家計之耗曾莫之顧見兒

曹津津絃誦每撫掌長嘆曰苦讀三世必得一發余家自宋卜
居于此勤事帖括者雖代不乏人而汝祖僅領歲薦授別駕曾
不得一登賢書焉我與爾不食其報子孫必有大發厥祥者矣
且也居近遞舖里許父養重自高足跡不至鄉之君子迄今嘆
服不已又其大者事庶母以孝晨昏定省罔敢有缺至于享祀
惟豐喪葬盡禮兩舉喪事竭誠致敬所有膏腴田產悉義讓之
叔父父甘受其瘠者亦足見孝友之一端乃若祖塋有鬻樹者
捐資易之鄉鄰有競鬪者竭力勸之宗黨有橫逆者姑不校置
之休休雅度一時冠出羣英至微而言動端詳取與不苟以節
約治家以仁慈御下此又其剩美不肖雖禿穎莫悉姑舉其大

畧而謹志之以俟後君子之表揚焉

明崇禎五年歲次壬申孟秋月

男應統百拜恭紀




仁齋公行畧

我父仁齋公誕之六年而大父輒仙逝賴祖母陳氏矢節撫育至于成立父少時家業未饒不以爲艱嘗自謂曰大丈夫欲奮志青雲則難若成一家博一業又何難焉由是去儒業習家政朝夕經營不置繼而拓土田構堂厦人咸稱其孤而能立子成公有子若此可謂不死矣至于賦性慈祥里黨有貧乏者輒施濟之親朋有危疑者輒排解之絕不任德焉其親睦之風可觀一班且也安分自守公庭之中未嘗有一名一字每于過庭時親承提命曰爾欲上進寧方毋員寧樸毋華寧以和厚處世毋以賢智先人不肖輩聆此數語深加勗以襄父業不幸案甫

列名黷序父卽資志以歿哀我劬勞縱不獲榮封褒贈何至菽
水遺憾乃爾因不禁畧叙梗概而敬識之

皇清順治十一年歲次甲午十月吉日

男朝宗百拜恭紀



用賓公墓誌銘

安吉芝溪庠生用賓姓朱氏諱朝宗與余弟風雨雞窗友也品
度深沉才學敏達博觀往古之迹勤思當世之務每以豪傑自
期許迨補弟子員平生勇于爲文有韓蘇風致凡邑侯博士咸
敬禮之謂必遠到云惜父仁齋公逝世分理家政然逢時感興
輒吟咏以寫懷博竒愛古豈因未能卒業而遂隳厥志哉奉母
費孺人極盡孝養而與伯兄耀宗季弟台賓尤相友愛焉處家
庭有禮御臧獲有恩顧性嚴毅不苟笑謔內外一聞警咳卽莫
不悚然懼是以鄉後生見輒嚴憚之未有敢恣肆者嗣君明晉
庠名鼎煥字爾賡次明昇庠名鼎耀字象羽二明揚又諱觀字

孚若三鳳齊飛君之延慶甯有窮歟公生於萬曆癸巳年九月二十日戌時配獨松王氏生於萬曆癸巳年六月初八日克相夫教子卒於順治丙戌年六月初九日繼配李圩王氏生於萬曆戊戌年八月初一日卒於康熙甲寅年二月初三日公卒於康熙己酉年十一月二十一日酉時合葬餘墩鷺鸞形


銘曰

紫陽遺澤篤生後賢文成白鳳學擅青錢碩人既逝永宅新遷祥鍾馬鬣瑞協牛眠幽宮隧此瓜瓞綿綿

皇清康熙二十八年歲次己巳大呂中浣之吉

賜進士出身授山西夏山令擢給事中歷任戶部工部吏部年家

眷同學弟姚廷啟頓首拜書



方來公傳

公諱正綏字方來庠名芳厥考家訓公之長子也總角時潛心典籍卽能通孝經論語旣冠遊庠文名丕振每赴試輒爲諸生冠事父母性純孝凡起居食息曲體親心與兄弟一室雍雍有棠棣之歡無角弓之釁蓋其天性樸茂庸行克敦有超出于尋常外者是以鄉人莫不愛之慕之也後舉鄉飲介賓行表言坊一時推重而公則抑然自下履滿思謙噫古人所謂年彌高而德彌邵者其在斯人與其在斯人與余不文未能導揚盛美然其大概有不可沒者于是乎書

皇清乾隆四十四年己亥之秋

嫺再晚生柳塘郎期元頓首拜撰

